

The Makuilongdi Express

Liangmai Daily Newspaper

"Mazibo niu ngamne"



Congress niu launch thiubo Bharat Jobo Yatra, Rahul Gandhi niu majang luju chaphiniu km 3500 tadrabo khatdi naimikpui 150 kumbo ngutrabo phiukem N-genhiu zengtung 7th ga tadkinbo puitadga papuidi ndanai Karnataka ga tadjou khai mide.

Thaimien 36th National Game Gujarat ga tadkiujiu bamboga Manipur State maipuimai gu football team niu Mizoram tu 5-0 ga ngamjiu Semi-Final ga ngut mide.



Zengtung 7 Chagaahiu 2022 Kajannai Chiang PO Tamei, Tamenglong Dist. Manipur Vol.01. Issue 14 Page 1

Jesu niu paokakge, "I hai npui siye, mazibo siye, khatdi karingbo siye; akhu gasu makjiu maikhat niudi Apiu khulam wanglu lakge." Johan 14:6

India gasu taliu padbo makhiupiu nai thik kasuangbopiu WHO niu phui masanra din mide.

IFP Bureau

Chag. 6: World Health Organisation (WHO) niu India Maiden Pharmaceuticals Limited gasu taliu padbo makhiupiu dui (Cough Syrup) nai thik kasuangbopiu dui (Cold Syrup) phui masanra din mide palamra sibopiu tiubo gasu kidney sajiu Africa kadih Gambia ga chamai 66 shaitang mide chiujiu WHO gu Director- General, Tedros Adhanom Ghebreyesus niu tacham ga din mide.



Imphal. Chag. 6: Manipur, Senapati district gasu takum 22 mibo Banner Lanamai James niu Rubaru Mr India Youth Icon 2022 gu zanthen (Title) hai doumide. Haibo edition hai Crowne Plaza Chennai Adyar Park, Tamil Nadu ga tadkiubo we. Thainai Banner niu haibo tathon luwangbo niu Manipur mai thiujui paluan nia leng mide chiujiu dinne. Pahai Poumai zatle, Lower Khamsom nam gasuwe chiujiu dinne. N-daasai kumdi Songashim Rungsung, Ukhrul district gasu niudi haibo zanthen hai luwang bowe chiujiu dinne.

Naga Women's Union (NWU) gu luan 28th Annual Assembly cum Foundation day. Noney ga tadkiu khaimide.



Correspondent

TME. Chag. 6: N-dahnai Longmai Auditorium Hall, Longmai 3 (Noney) ga luan 28th bo Naga Women's Union (NWU) gu Annual Assembly cum Foundation Day hai tadkiu khai mide chiujiu dinne. Zengtung 4th-6th Chagaahiu 2022 katang tadkiubo madui hai Rongmei Naga Luh Phwam niu dengkhai bowe chiujiu dinne. Haibo maduiga former president LM Tabitha niu pengphai zusu khaiye khatdi Lahpui Veronica niu NWU gu history release

thiukhai ye sironna makjiu TS Hrignay Anal, S Ari Poumai, Dr. Solemwon Ramsan Tangkhul paliuniu Speaker, Deputy Speaker, khatdi Secretary thiukhai jiu annual assembly hai tadkiu khai mide. Haibo maduiga tribe 22 khatdi delegate chamai 150 wangkhaiye. Madui loikiubo nai nchamjiu Chamdanliu President RNLM niu pengphai zuki khaijiu khatdi Kaishu Kashipri niu kaloibo rathoi lukhaijiu maduihai loikiu khai mide chiujiu tachammga dinne.

CADA niu liquor policy draft thiupadbo tu lulakge chiujiu dinmide.

Imphal. Chag. 6: Manipur State Cabinete niu zou zonsuira lepad gu policy state government niu draft thiupadbo tu Coalition Against Drug and Alcohol (CADA) niu suilakge haisi masan siakjiu ariak thiujui (White Paper) pipad maksai Nupi Samaj niu agitation tadkiune chiubambo tu support thiujui tadngut raye chiujiu tachamga d i n n e . N d a a n a i P u r e i r o m b a Khonnangkhong, Imphal East District ga office ga

IFP Bureau tacham lumai khuga general secretary Geetchandra Mangang CADA, niu dinjiu draft copy of 'Manipur Liquor Regulation Policy' tu makge, haisitu white paper chiujiu CADA khengbo makge chiujiu din mide. Panu dinjiu, white paper chiubora kapad kangut lamga zou lepatsai government niu ndebo jaiga control kamralo khatdi public mainiu maniubo chamkakang lamga masanjiu phungpatbo tuwe chiujiu panu dinne.

Nahmai 22 joujiu 34 tu Thailand kadihga chaganmi niu kepsat mide.



source Imphal Time

Bangkok. Chag. 6: Thailand gu capital Bangkok gasu 500km kumbo diumibo town Uthai Sawan, Nong Bua gu province ga arai masuang police tadkhaibo maipiu khatni Kajannai nien Children's Day-Care Thailand ga ngutjiu chaganmi niu kepjiu chamai 34 tu kepsat mide sigasu chaganmi niu chamaitu kepsatbo poudi paronna patu kepsat tajut mide chiujiu dinne. Shaibo ruangga nahmai chamai 22 zouwe chiujiu dinne. Thailand kadih gahai haikumbo kakeng padmak bowe, paliu kadih gara chaganmi kajonmai maksai mahinjiu chaganmi alibo sotga phuisai kakibo kadih suang maji makbo zaiga chaganmi hai pangzon-zonbo kadih ye chiujiu dinne.

Karingting Lunlung



@@Aliu area gadi Hindu mai kengbam jiu Durga Puja changee madisai wine chia! ###Ndegung leng?

@@@Paliu ratu taduiga maten khaiboga rangkang, tamtambo mahin khoira chia.

Pagu kadih tu lungsa simak mai wakhat tudi lungsa ngam lakge.

Editorial

Chakhuang changee

Naikhat makimai piu khatni characham dinken wangjiu haichiu dinne, aliura changee (Festival) kengjujiu lungwikhang silakmiboi, chiujiu dibotumaning touwe. Chamainah lungjiu chageebo, matha malaabo chiubori kawi haye chiudi pajai khatlam phuikhe sai changee kengjudi agu economic lamra niachang niabo bamme. Tuhoi aliu Liangmai zatdi katheng kadimai, wasimai kengpadjiu bamme. Chiudi changee hai pachat/pajat kengjujiu donation donniu di chapi thiubam takge. Christianity gu, Youth, Men, Women, Jubee Association gu etc. sigasu Student, LSA, Confrence, sigasu village gu tamambo activities niu paki put taju wangboga, pikhedi kikhungu management lam putmi pimakkhe di taju sami chiujiu kakengra dinpat maksang chariubo wajiudi bamta lakge. Societies dungdi tuhoi haikumbo function donniu nam-nam gadi chuncham lakbo padbo hai hamakge. Siniu chagee haisi pasaileng gengrabo prospect/vision habo khatdi bambo phui mawi lujiu changee boniu mathiu leng pajat chara bamsune.

Rai thubo Paren District Football League tadkiu mide.



AIR News Kohima

Peren. Chag. 6: Peren District Football Association niu organised thiubo 1st Paren District Football League 2022 hai tadmibo Machanai niu B Jalukie Football Ground ga takiu mide. Lepatbo ngamhai Entrepreneur & Co- Founder YouthNet Nagaland Kuchi Rangkau niu kamkhai mide. Haibo league ga club tachat (Eight Club) niu zoujiu bamme chiujiu dinne.

**GOVERNMENT OF MANIPUR
OFFICE OF THE DUPTY COMMISSIONER
TAMENGLONG DISTRICT**

NOTICE

Tamenglong, the 5th October, 2022.

No. DC (TML) 11/LA/2022 (TML-Halflong Rd): It is hereby notified for information of all concern that Shri Awangbow Newmai, Hon'ble Minister of water Resources, Relief & Disaster Management, Govt. of Manipur desires to have a meeting with all village Authorities and land owners of Inrianglong, Dailong, Namtiram-I, Namtiram-II, Phellong, Azuram, Mandeu and Tousem in connection with Tamenglong to Mahur road (NH-137) in presence of the Deputy Commissioner, Tamenglong on the following date & time as given below.

Sl. No.	Date	Time	Vanue
1	7th Oct.2022	2.00pm	Indoor Stadium TML.

All concerned are hereby instructed to attend the said meeting on time positively.

**Sd/- (Thangboi Gangte)
Addl. Deputy Commissioner, Tamenglong**



Lianglad raora siolen khaibo

Source: LLS (M) Liangmai Orthography Guideline, 2022
Lianglad raora siolen khaibo Haisi Liangmai Literature Society (Manipur) gasu lupadbo guwe. Thainai khagiak nai siugiak (consonants/vowel) lamga phuine. Modified roman letter hai masuang gasu thinbam niuwe. Pakhon sai suiuiu thinrabo giakdung haiga lenkhaiye. Khagiak--p, ph, b, d, t, th, k, kh, g, m, n, ng, ch, s, z, r, l, h, w, y. Siugiak-- a, e, i, o, u.
Hai kamakbo pagiak--f, j, sh haisi di chaladkeng khangsia ga rona (limited vocabulary) ga thinne, palamra paliu hai aliu ariak karaobo zaiga (including personal name and place ga) masuang gasu ngutmibo donniuwe. Haibo giak dung si chaladkeng tu kam npek wira (differentiation) jengniu di thin bamme.

J = grammatical word ga ronna thinne, e.g. - jiu, sijengniu, khatdi personal name maksai proper name e.g. Jesu, Tajanliu, etc) ga thinne.
f = wazan (noun) ga ronna thinne, sisidi syllable nia bambo ladkeng ga, pa-niabo s y l l a b l e (second syllable) ronna thinne, e.g. chafai, chafiu, etc. Verb maksai katambo ladkeng ga thin lakge, e.g. fiubo, fuibo chiumakjiu phiubo chiune.
sh = haibo giak (symbol) si kasabo (Negative sense) kathiubo ladkeng ga, e.g. shai 'die' taset 'unfortunate incident', rasha, etc kumbo ga thinne. Haibo giak (symbol) si sh bam tadi, s gu khonga (pronounce kamne) phapadne. Padon padlanbo nikkak lamsu padlan sune.

Luan 31st ZSUD Annual Freshers' Meet hai Chagaahiu zengtung 15th ga tadkiune.



From TME Correspondent
TME.Chag. 6: Wangkinbo Chagaahiu zengtung 15th, 2022 nai luan 31st bo Zeliangrong Students' Union Delhi gu thiuiu Annual Freshers' Meet hai Dilli Haat Auditorium, Janakpuri, New Delhi ga, "Revisiting the Idea of Zeliangrong" chiubo ladpui hang gasu tadkiune chiu jiu tachamga dinne.

Haibo maduiga Shri Dinganglung Gangmei Retd. IAS, HAC chairman, MLA, Manipur niu chagiangpi thiukhai sune khatdi Shri K Elu Ndong, General Secretary, Naga Hoho, niu chakhuang giang thiukhai sune di James Riamei niu special artist thiukhai chiujiu dinne.

Naga ruangga ariaknah thiuiu lung makeng kachangbo hai aliu Zeliangrong maiye khatdi government nai private offices gachakam kambambo di keng kachangbo thiuiu India gu Capital ga bambowe chiujiu dinne. Covid rapot zengniu takum sum haikumbo changee, changee tou talujiu thaikumniu changee obulanbo hai ndejiu aliu san wilo chiujiu organising committee gu ladbam ganiu dinne. Wang kasui hinang wangkhaira chiujiu kukhajiui bam mide.

Sikhaibo

Nidkak khatga paluan khat Kajannai machang LLS niu Lianglad raora siolen khaibo hai publish thiukhai ne. Siniu aliudi paliuniu pikhai bambo guideline hangga maihinang n-chamlura jengniu majai khaikhe. Haisi aliu Liangmai mathiu nchamlura jengniu paliu zengpum wajiui hajiui taliu macha padbowe.